



LE GOUVERNEMENT
DU GRAND-DUCHÉ DE LUXEMBOURG
Ministère des Affaires étrangères
et européennes

Le Ministre

Luxembourg, le 16 juillet 2021

Le Ministre de l'Immigration et de l'Asile

à

Monsieur le Ministre aux Relations avec le Parlement

J'ai l'honneur de vous faire parvenir en annexe, la réponse commune des Ministres impliqués à la question parlementaire N°4522 posée par les honorables Députés Messieurs Fernand Kartheiser et Roy Reding

A handwritten signature in blue ink, appearing to be 'JA' or similar initials.

Jean Asselborn



**Gemeinsam Äntwert vum Här Asyl- an Immigratiounsminister an der Madamm Justizminister
op d'parlamentaresch Ufro 4522 vum 18. Juni 2021
vun den honorabelen Deputéierten Här Fernand Kartheiser an Här Roy Reding**

Ad 1:

Tëscht 2018 an 2021 sinn insgesamt 62 Scheedunge vu eritreeësche Staatsbierger vu lëtzebuenger Geriichter gesprach ginn. 2018 gouf keng Scheedung gesprach. 2019 goufen 1 Scheedung a géigesäiteger Zoustëmmung a 7 Scheedungen wéinst dem Scheitere vum Zesummeliewe gesprach. 2020 sinn insgesamt 38 Scheedunge gesprach ginn, wouvunner 1 Scheedung a géigesäiteger Zoustëmmung war a 37 Scheedungen wéinst dem Scheitere vum Zesummeliewe. Dëst Joer goufe bis ewell 16 Scheedungen wéinst dem Scheitere vum Zesummeliewe gesprach.

Ad 2:

Eritreeësche Staatsbierger reechen aus de selwechte Grënn Scheedungen an wéi Staatsbierger vun aneren Natiounen. D'Scheidunge sinn awer och op déi méi speziell Situatioun vun eritreeësche Staatsbierger zeréckzeféieren.

An de meeschte Fäll sinn d'eritreeësch Staatsbierger virun e puer Joer ouni hire jeeeweilege Partner op Lëtzebuerg komm. Nodeems hinnen de Statut vum *refugié* accordéiert gouf, hu verschiddener d'Demarchen ënnerholl fir de *regroupement familial* unzefroen. Vu dass tëscht dem Départ fir op Lëtzebuerg ze kommen an der Demande fir de *regroupement familial* e puer Joer vergaange sinn, befannen sech d'eritreeësche Staatsbierger oft an der Situatioun, dass hire Partner entretemps een neit Liewen ouni sie ugefaangen huet an nët op Lëtzebuerg nokommen wëll. Sou een Refus vum Partner gëtt oft als Scheedungsgrond bei eritreeësche Staatsbierger festgestallt.

Ad 3:

Der Regierung leie keng Donnéeë vir, wat d'Finanzéierung vun dëse Scheedunge betrëfft.

D'Servicer vun der *assistance judiciaire* vum Stadter a vum Dikrecher Barreau féiere keng Statistik iwwert d'Nationalitéit vun den Demandeuren vun enger Prozesshëllef. Et ass dohier net méiglech de Käschtepunkt vun den Prozesshëllef betreffend Scheedunge vun eritreeësche Staatsbierger ze ermëttelen.

Ad 4:

Aus den Zuelen vun der Inspection générale de la Sécurité sociale (IGSS) geet ervir, dat Enn Mäerz 2021 vun 243 eritreeëschene Staatsbierger, déi hei am Land wunnen an schaffen, 15 Leit mat engem Etat civil als "gescheet" agedroen sinn.

Ad 5:

Ob Nofro hin beim Familljeministère, deen d'Tutelle iwwert de Fonds national de Solidarité (FNS) huet, ass ze präziséieren dat den FNS grondsätzlech keng Statistike iwwert Leit déi an enger

Scheidungsprozedur sinn féiert. Dat selwecht gelt fir Statistike déi ob der Basis vun der Nationalitéit vun de Revisbeziher opgestallt ginge ginn.

Fir de Revis ze kréien muss den Demandeur en Droit de Séjour hunn an och effektiv zu Lëtzebuerg wunnen. Et ass méiglech dat bei enger Koppel ee Conjoint hei am Land wunnt an de Revis kritt, an deen anere Conjoint am Ausland wunnt oder och guer kee Wunnuert bekannt ass. Allerdéngs spillen an deene Situatiounen d'Dispositiounen vum Artikel 11 vun der Loi modifiée vum 28. Juli 2018 iwwert de Revenu d'inclusion sociale, laut deem den Demandeur seng Alimenterechter geltend muss maachen.

Ad 6:

Eng Scheedung kann een Impakt op den legalen Status vun enger Persoun zu Lëtzebuerg hunn, wann dës Persoun eng Openthaltsgeneemegung als Familljemember vun enger anerer Persoun hei zu Lëtzebuerg hat. Et léien der Regierung keng Informatiounen vir an wéi ville Fäll eng Scheedung eng Ännerung vum legalen Status mat sech bruecht hätt.

Ad 7:

Der Regierung leie keng Erkenntnisser vir iwwert méiglech Zesammenhäng tëscht Genitalverstümmelungen an der Unzuel vu Scheedunge vu eritreeesche Staatsbierger zu Lëtzebuerg.

Ad 8:

Den Artikel 3 vum lëtzebuerger Code civil gesäit vir, dass den Zivilstand an d'Kapazitéit vu Lëtzebuerger eleng duerch d'lëtzebuerger Gesetz gereegelt sinn. Am eritreeeschen Droit gëtt et keng equivalent Reegel fir Eritreeër.

Den Artikel 254 vum lëtzebuerger Code civil gesäit vir, wéi e *conflict de loi* am Kader vu Scheedungen ze reegele sinn. Falls béid Partner déi selwecht Nationalitéit hunn, da gëtt d'Gesetz vun dësem Land ugewannt. Fall si verschidden Nationalitéiten hunn, da gëtt d'Gesetz vun dem Land ugewannt an dem si gemeinsam wunnen. Falls si net an dem nämmelechtem Land wunnen, da gëtt d'Gesetz vun dem Land ugewannt, wou d'Scheidung agereecht gouf.

An der Majoritéit vun de Fäll bedeit dëst fir eritreeesche Staatsbierger zu Lëtzebuerg, dass dat eritreeescht Gesetz op d'Scheidung ugewannt gëtt. Dëst Gesetz ass konform zu eisem *ordre public* a kennt notament och d'Scheidung wéinst dem Scheitere vum Zesummeliewe. Nëmme wann de Partner net d'eritreeesch Nationalitéit huet, kann et zur Uwendung vum lëtzebuerger Gesetz kommen. Aus dësen Grënn bitt sech d'lëtzebuerger Scheedungsgesetz net fir een "Scheidungstourismus" fir eritreeesch Staatsbierger un.

Et gëtt och keen Zesammenhang tëscht der Zuel vun den unerkannten Flüchtlingen an den Modalitéite vun den Scheedungen, well d'Leit, fir als Flüchtling unerkannt ze ginn, eng Demande mussen stellen, déi dann op Basis vun den gesetzlech Konditiounen iwwerpréift gëtt.